

Un Aparato pa Kontrolá

Senso 1992 a rebelá ku nos isla ta hasi mas uso di aparatonan. Desde 1981, tin mas frishidèr (4%), telefon i èrko (5%), outo (9%), frizer (10%), i wasmashin (15%). Ma e aparato ku a krese mas den uso ta televishon (21%). Awor 86% di e 2.987 kasnan na Boneiru tin e aparato aki, i 61% ta aboná na kabel.

Ma senso 92 tambe a rebelá ku mas òf menos 418 residensia (14%) no tin televishon, i aproksimadamente 1.165 kas (39%) no ta aboná na kabel.

Pakiko? Pakiko tin tantu kas sin televishon? Pakiko tantu habitashon ku tin televishon no ta aboná na kabel? Básikamente tin dos motibu:

1) Algun hende NO POR kumpra òf aboná. Algun hende (kisas un ansiano ku ta lora ku solamente su penshon di biehes) tin un entrada asina chikitu ku nan no por kumpra un televishon. Otro hende no tin sèn pasobra nan ta malgast'e, kisas pa un bisio, manera droga, alkohòl, òf wega di plaka.

2) Algun hende NO KE kumpra òf aboná. Ken lo ta asina loko ku nan no ke un televishon i kabel na nan kas? Wèl, lo mi atmití ku ami ta un di e lokonan ei. Mi tin un televishon ma kabel nò. Dikon? Permití mi kompartí tres motibu.

Pa di promé, mi sa ku si mi no ta dominá televishon, e lo por dominá mi. I no ta mi so. Hopi hende ta katibu i adikto di televishon. Mundu ta kaba pa nan si nan pèrde un episodio di un novela. E apòstel Pablo a bisa, "...tur kos ta pèrmití, ma lo mi no laga ningun tuma bentaha riba (dominá) mi" (1 Corintionan 6:12). Dios ke pa nos ta liber di tur adikshon, inkluiendo televishon.

Na di dos lugá, kabel ta muchu karu. Bo por spar fl. 900 e promé aña ku bo no tin kabel. Ma mi ta pensa di karu den un otro sintido. Pa mi, kabel lo eksigí muchu tempu. Si mi paga 50 florin kada luna pa kabel, lo mi ke invert suficiente tempu dilanti televishon pa saka mi 50 florin. (Kisas ta mi so ta sufri di e lokura ei.) Mi ta preferá invertí mi tempu pa kos di mas balor.

Bo famia tin mas mester di bo tempu. Den un estudio, nan a pega mikrofon na paña di yunan di diferente famia pa un siman, i a haña sa ku diariamente tatanan a invertí 37 sekòndu so pa nan yunan. Sin duda, e mesun tatanan lo tabatin tempu pa televishon. Bo famia tin muchu mas balor ku televishon!

Mi a opservá un famia djaserka. E yunan a hunga weganan kreativo i aktivo den kurá, p.e. vòli ku un bala di tènìs. Nan a kombersá, nan a hari. Anto nan a kumpra televishon. E weganan a stòp, e komunikashon den kurá a kaba, i nan tur ta di pròp riba sofá manera manikin ku wowo fihá riba un kaha elektroniko. Ma televishon no por remplasá komunikashon personal i aktividat kreativo.

Un di tres problema ta e moralidat ku hopi programa ta propagandá. Nos tur sa mira muchanan tira otro ("bow bow, bo ta morto!") òf hunga lucha libre. Di unda nan a siña esei? Televishon. Esei ta weganan di mucha. Ma mas ku 3.000 estudio ta konfirmá ku e violensia ku muchanan i hòbennan ta mira na televishon ta hasi nan mas agresivo. (Segun e titularnan di korant, nos tin mester di mas agresividat na nos islanan?) Nan ta aktua loke nan ta mira. Tin kasonan dokumentá di matamentu komo resultado di wak sierto pelikula. Esei no ta wega!

I kiko di e esenan di desnudes i aktonan inmoral? Na televishon ken ku ta, ta drumi ku otro manera nada n' pasa. I tur otro klase di aktonan indesente t'ei pa ken ku ke mira. Ma nunca televishon sa mustra e konsekuensia teribel di drumi ku ken ku ta...famianan kibrá, enfermedatnan veneriko, AIDS, i morto! Ki influensia destruktivo esei ta laga riba nos yunan presioso! I tin ora e lenguahe ta vulgar, sumamente ofensivo, i mes inmoral ku e aktonan.

Dios ke pa bo yena bo mente ku kos bon. E hòmber di Dios, David, a primintí, "Lo mi no pone nada malu dilant'i mi wowo" (Salmo 101:3). Ma nos ta sinta gosa maldat trankil den nos kas. Hende ku kisas lo bo prohibí di drenta bo kas, bo ta permití pa e indoktriná bo yu ku su étika venená na televishon. No lubidá, loke abo i bo famia ta wak, lo tin un afekto riba boso.

Mi no ta kondená ningun persona ku tin un televishon òf ta aboná na kabel. Ma mi ta boga pa bo kontrolá bo televishon. No permití bo yu wak kiko ku ta na televishon. Duna un bon ehempel na bo famia; skrin loke bo mes ta wak. I hasi uso di bo oportunidat di laga TV 11 sa ku bo ke programashon desente i moral.